

Date – 02/07/2026
Regional News Unit AIR Aizawl
Thursday, July 02, 2026

AKASHVANI AIZAWL

REGIONAL NEWS BULLETIN

HEADLINES (MORNING)

- Chief Minister Pu Lalduhoma'n eizawna atan Football a pawimawh chho zel tih sawiin mahni inthunun theihna leh tumruhna in dinhmun sang zawk a hruai thleng thin tih a sawi.
- Tourism Minister Pu Lalnghinglova Hmar chuan Mizorama Tourism hmasawna ah khawtlang nena tangruala hmalakna 'Community Based Tourism' a pawimawh hle tih a sawi.
- NGO Coordination Committee-chuan Electoral Roll-ah India khua leh tui dik tak chauh thun an nih theih nan huaisen taka hmala turin a buaiputute an ngen.
- One Nation, One Election Joint Parliamentary Committee Chairperson P P Chaudhary chuan Lok Sabha leh State Legislative Assembly inthlan neih rual a pawimawh a ti.

<><><>

CHIEF MINISTER

Chief Minister Pu Lalduhoma'n eizawna atana Football a pawimawh chho zel tih sawiin mahni inthunun theihna leh tumruhna in dinhmun sang zawk a hruai thleng thin tih a sawi.

Nimin tlai khan Adidas leh Mizoram Football Association te chuan Rajiv Gandhi Stadium, Mualpuiah Exhibition Match "The Home of Football" an buatsaih a, Chief Minister Pu Lalduhoma chuan telpuiin he exhibition Match-ah hian Mizo footballer India Super League leh India Football League a khelte an inkhel a ni.

Pu Lalduhoma chuan Adidas chu India rama football hmasawna kawngah an thawhhlawk hle a, infiammite thawmhnaw siam mai bakah grassroot football ah te leh youth development ah hma an la a ti a. Khawvel huapa infiamna thawmhnaw siamtu langsar takin Aizawla "The Home of Football" Exhibition Match a rawn buatsaih chu lawmawm atih thu a sawi a ni.

Chief Minister chuan ISL leh I League players te chu mahni khua leh veng local ground-a bul tan a, dinhmun sang zawk thleng chho thei an ni a. Naupang leh thalai talent nei thaten mahni inthununtheihna leh tumruhna hmangin, an dinhmun ang an thleng thei a ti a, Football chuan state economy-ah a thawh hlawk chho zel tiin thalai tam zawkten professional football an khelch chu an tangkaipui thu a sawi.

Pu Lalduhoma chuan Sorkarin Football-a hmasawna a ngaipawimawh avangin state chhung atanga I League khel phak Football Club pahnih Chanmary FC leh Aizawl FC te chu Handholding hmangin tanpuina an pek thu a sawi bawk.

<><><>

VB G RAM G

Sorkar laipuiin Ni 100 inhlawhna tia hriat lar, MGNREGS thlakna atana a duan, Viksit Bharat – Guarantee for Rozgar & Aajeevika Mission (Gramin) ,VB G RAM G chu nimin atang hian hman tan a ni a, Mizoramah pawh hman tan ve nghal a ni.

Rural Development Minister Prof Lalnilawma chuan VB G RAM G chu ram rohlu thil siam nan hman a nih theih nan mipuiten ngaihtuahna seng se a tih thu a sawi a, nimin maia sorkar laipui atanga thu an dawn angin, VB G Ram G hnuaiah hian ni 1 ah cheng 300 hlawh theih turah an ngai a ti a ni. Prof Lalnilawma chuan Job Card nei te chu an rin chhonzawm dawn mai bakah inziaklut duh te chu Gramin Rozgar Guarantee Card pe tura inbuatsaih a ni a ti.

Puan tawh angin VB-GRAMG atan hian Central Sawrkar in Mizoram chu cheng vbc 611 leh nuai 65 a pe tawh a, State Matching Share cheng vbc 67 leh nuai 95 pawh State Sawrkar in a ti fel tawh a ni.

Rural Development Minister Prof Lalnilawma chuan, Mizoram chu State Scheme siam hmasa ber a nih thu te, State Rules hrang hrang pawh a ruangam peih vek a ni tawh thu te, internet connectivity Chiang Kuang lo chung chung a e-KYC leh Face Authentication ah te Mizoram chu a sang pawl an nih thu te a sawi a. MGNREGA ang bawka VB-GRAMG chu tangkai taka mipuiin an hman zel a beisei thu a sawi a ni.

VB – G RAM G Act, 2025 hi thingtlang mite hmasawna leh inhlawhna tur siamna dan a ni a, a tum ber chu thingtlang hmasawna leh kum 2047-a Viksit Bharat - India ramintodelh, ram changkang nih a tumna nen thlun zawma kum khatah ni 125 inhlawhna thingtlanga chengte tan siam leh hmasawna ruhrel tha leh tlo siam a ni.

<><><>

TOURISM MINISTER

Tourism Minister Pu Lalnghinglova Hmar chuan Mizorama Tourism hmasawna ah khawtlang nena tangruala hmalakna ‘Community Based Tourism’ a pawimawh hle tih a sawi.

New Delhi-a cham mek Pu Lalnghinglova Hmar chuan Minister of State leh Secretary Pu Bhuvnesh Kumar kawmin Mizorama tourism project kalpui mekte leh project hmachhawp hrang hrangte an sawi dun a, Tourism Minister Pu Lalnghinglova Hmar chuan tourism hmasawnaa Mizoram sawrkar hmalaknaah Ministry of Tourism puihna leh duhsakna chu lawmawm a tih thu a sawi a. Ram chhung leh pawn atanga tlawhtu pung zelah Mizoramin khualzin thahnem zawk a hip theihna tura theihna a neihte tihpuitlin chhoh zel a duh dante a sawi.

Meeting-ah hian Mizoram atanga Ministry of Tourism scheme hrang hrang hnuaia project thehluhte thlrho a ni a. Pu Bhuvnesh Kumar chuan Tourism Ministry kalphung a inthlak chho mek tih sawiin, hmun tam taka project te reuh te te siam lovin, state pakhatah project lian tham pahnih khat kalpui a, khawvel huapa lang tham ‘destination’ siam tum a nih thu a tarlang. Hemi atan hian scheme awm sate pawh belhkhawma scheme thar duan a nih thu leh, tun atanga rei loteah approval hmuh a hman theih beisei a nih thu a sawi a ni. Scheme thar kalphung tlangpui sawiho a ni bawk.

Pu Lalnghinglova Hmar chuan Mizorama tourism hmasawwnaah khawtlang nen tangruala hmalakna, ‘community-based tourism’ leh tourism entrepreneur te an pawimawh hle tih sawiin, Tourism Ministry scheme tharah pawh component pakhat anga telh theih nise tiin rawtna a thlen a. Union Secretary chuan Central sawrkar pawhin a ngaihpaawimawh thu leh, scheme tharah telh a nih tur thuin a lo chhang a ni.

<><><>

NGO COORDINATION COMMITTEE

NGO Coordination Committee-chuan Electoral Roll-ah India khua leh tui dik tak chauh thun an nih theih nan huaisen taka hmala turin a buaipuitute an ngen.

Mizorama tlawmngai pawl hrang hrang Central YMA, MUP, MHIP, MZP leh MSU intelkhawmna, NGO Coordination Committee leh hnam bil pawl thenkhat Central Young Lai Association, Mara Thyutlia Py leh Central Young Chakma Association hruaitute chu nimin khan Tuikhuahtlanga Central YMA Committee Room-ah thukhawmin, Election Commission of India ruahmana Electoral Roll ennnawn beihpui thlakna, Special Intensive Revision, 2026 neih mek chungchang an ngaihtuah a.

Tlawmngai pawlte chuan, Enumeration Form Digitisation tluang taka zawh a ni chu lawmawm an tih thu sawiin, thawktu zawng zawng chungah lawmthu an sawi a. Tun thla ni 5 atanga thla thar, August ni 4 chhunga Electoral Roll-a inthun belh leh paih dilna hun hawn turah India khua leh tui dik tak chauh Roll-a thun an nih theih nan huaisen taka hmala turin a buaipuitu - ERO, AERO leh BLO-te an ngen a. Hearing neih hunah pawh uluk takin NGO hrang hrang chuan an huam chhungah theuh ulk takin an vil zui dawn tih an sawi.

<><><>

MIZO TAXI APP

Mihring phur chi sumdawnna lirthei chi thum-four wheeler taxi, two wheeler taxi leh auto rickshaw te hman tura duan Mizo Taxi App chu nimin khan Transport Minister Pu Vanlalhlana'n a tlangzarha, hetihlai hian passenger phur lirthei intelkhawmte erawhin an dodal zui zel.

Mizoram Taxi Association (MTA), Aizawl Two Wheeler Taxi Association (ATTA) leh Aizawl District Rickshaw Owners Association (ADAROA) te chuan sorkarin ruahmanna an siam hi an duh loh thu leh Mizo Taxi application-ah inziak lut lo turin an member te an lo chah tawh a, hemi chungchangah hian Two Wheeler Taxi Association President Pu Lalhmunmawia chuan kan Corr.

zawhna chhangin hetiang hmalakna lian tham a awm dawn anih chuan tuna an rate hman lai mek 2024 a mi chu ennawn sak hmasa se an duh tih a sawi a, an duh loh na lai pawh STA-ah te, Minister-ah leh lehkhaw pawh vawi-3 an thehluh tawh thu a sawi a ni.

Kan corr report ngaithla ang.

MizoTaxi online application hmang tur hian Cheng 500- inziah luh a ngai a, nimin thleng khan lirthei 974 inziak lut an awm tawh a, 4- Wheeler Taxi 275, Auto Rickshaw 17 leh 2 Wheeler taxi 683 in register an awm tawh a ni.

State Transport Authority (STA) chuan hriattirna a tihchhuah-ah Mizo Taxi App-a inziah luh hun tawp thlenga inziaklut an tlem a, Mizo mipui a phuhruk loh chuan Mizo Taxi App hmanga tlan tur permit pek chhuah an tum thu an lo sawi tawh a ni.

<><><>

EXCISE MINISTER

Excise & Narcotics Minister, Pu Lalnghinglova Hmar leh Narcotics Control Bureau Director General, Pu Anurag Garg chu nimin khan New Delhi-ah an inkawm a, Mizorama ruihhlo do kawnga hmalakna kal mek leh hmachhawp hrang hrang an sawidun.

An inkawmnaah hian Pu Lalnghinglova Hmar chuan, ruihhlo do letna kawnga Narcotics Control Bureau puihna hrang hrangah lawmthu a sawi a, tun hnaiah ruihhlo donaa hman atan NCB atanga motor engemawzat an dawn chu tangkai taka hman mek a ni a, motor hi an la mamawh belh zel tuh a sawi nghal a. Mizoram chu Myanmar ramri depa awm, ruihhlo lo luhna kawngka pakhat a nih avangin ngaihpawimawh a ngai a. Excise & Narcotics Department chuan Central Ministry-ah zawmpui a neih ve loh avangin chak zawk leh awmze nei zawka hmala turin NCB nen thawh hona tha zawk an neih a tul thu a thlen a ni.

NCB Director General, Pu Anurag Garg pawhin, ruihhlo do kawnga Mizoram hmalakna chu an lo hriat thin thu leh lawmawm a tih thu a hrih a. A thu thlen pawh theihtawp a chhuahpui tur thu sawiin, Aizawla NCB Zonal Office dinna turin approval a awm tawh a, a tihhlawhtlin kawnga hmalakpui turin a ngen nghal a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ONE NATION ONE ELECTION

One Nation, One Election Joint Parliamentary Committee Chairperson P P Chaudhary chuan Lok Sabha leh State Legislative Assembly inthlan neih rual a pawimawh a ti. New Delhi-a chanchinbumite a kawmnaah Pu Chaudhary chuan ram zalen a neih tir khan Lok Sabha leh Legislative Assembly te a ruala inthlan thin a ni a ti a. Mahse a hun hmaa legislative asembly thiah anih thin avangte leh state hrang hrangah President's rule puan anih avangin chhunzawm theih a ni ta lo a ti a. One Nation, One Election thatna tarlangin Model Code of Conduct puan nawn fo awm thin chu a tlem sawt dawn tih sawiin sawrkar inrelbawl a kaltluang ang a, ram eibar zawnna in a hlawkpui ang a ti.



HIGHWAY

Sawrkar laipui chuan kawngpui siamna tur project pahnih cheng vaibelchhe sing khat leh sang li hu a pawm. Project pakhat zawk hi Delhi-a thawh tur niin cheng vaibelchhe sang 6 leh 969 man a ni a. Hei bakah hian Uttar Pradesh-a greenfield highway cheng vaibelchhe sang 7 leh 145 man a tel bawk a. Union I&B Minister Ashwini Vaishnaw chuan hemi chungchanga chanchinbumite a kawmnaah heng project te hi sawifiahin Delhi khawpui lirthei tawt lutuk tihthawl a turin Dwarka Expressway-a NH-148AE-ah 8.1 Km a thui six-lane leiverh a ni dawn a. Hei bakah hian Uttar Pradesh-a National Highway-34 Kanpur-Kabraaj section a 117 Km. a thui 4 lane kawngpui siamna tur pawm a ni bawk a ti.



FIFA WC

FIFA World Cup khelkh mekah nizan khan Round of 32 khelkh chhunzawm niin Champion tura rinkai zinga mi England chuan 2-1 in DR Congo an hneh a. He inkhelah hian England chuan goal khat an phurh zet hnuah Captain Harry Kane chuan an siphurh sutin chakna goal a thun bawk a. Round of 16 an inpet kai a ni. Inkhel dangah Belgium chuan 3-2 in Senegal hnehin Round of 16 an lut bawk a. Tunah hian a thlengtu ram pakhat US leh Bosnia and Herzegovina te an inkhel mek bawk a ni.

